

ՊԱՆԴԻՍՈՒԹՅԱՆ ԹԵՄԱՆ XVIII—XIX ԴԴ. ՀԱՅ ՎԻՄԱԳԻՐ
ԲԱՆԱՍՏԵՂԾՈՒԹՅՈՒՆՆԵՐԻ ՄԵՁ

ՍԵՐԳԵՅ ԳԵՎՈՐԴՅԱՆ

Ամեն մի ստեղծագործություն, լինի դա արվեստի գործ թե գրական հուշարձան, նախ և առաջ տվյալ դարի ու ժամանակի ծնունդ է: Վիմագիր գրականությունն էլ չէր կարող կտրված լինել իր ժամանակից, հայ ժողովրդի կյանքում տեղի ունեցած շրջադարձերից¹: Վիմագիր բանաստեղծության մեջ այս կամ այն չափով ու ձևով իր արտացոլումն են գտել հայ ժողովրդի վերաբերմունքը դեպի քաղաքական անցուդարձերը, նրա պատկերացումները բնության երևույթների մասին, նրա հավատալիքները, կենցաղն ու սովորությունները: Մեր հայերը՝ ամենն ավելի ստվար թիվով ու ամենն ավելի գրական որակով հիշատակներ ձգած են իրենց ապագա սերունդներուն, կարելի եղածին չափ վայելչորեն ու անկորնչելի կերպով քանդակված մեծ ու պզտիկ քարերու վրան, անբաղդատելիորեն գերազանց ուրիշներե, սրտագրավ, հուզիչ և խորհրդավոր՝ իրենց պարունակությամբ մանավանդ զարմանալի կերպով հետաքրքրական իրենց կենսագրական հակիրճ տեղեկություններով, թվականներով ու այլ թանկագին ծանոթություններով², — գրում է Գ. Հնասերը:

Հայ վիմագիր ստեղծագործություններն ունեն ոչ միայն պատմագիտական, աղբյուրագիտական, սոցիալ-տնտեսական կյանքը լուսաբանող, արվեստագիտական, ազգագրական ու կենցաղագրական նշանակություն, այլև գրական արժեք և հանդիսանում են բավական հարուստ ու ինքնատիպ մշակութային մի ժառանգություն:

Հ. Աճեմյանը խոսելով մեզանում վիմագիր գրականության ուսումնասիրության վիճակի մասին, դեռևս 1934 թ. նկատում է, որ հայ վիմագիր «գրականությունը բազմատեսակ հետաքրքրական էջեր ունի, որոնց հավաքագրությունն ու հրատարակությունը՝ բացատրական ծանոթագրություններով հանդերձ, լուրջ ուսումնասիրության արժանի է»³:

¹ XVIII—XIX դդ. հայ վիմագիր բանաստեղծությանը վերաբերող նյութերը քաղել ենք հետևյալ հեղինակների աշխատություններից՝ Գ. Հնասեր (Մանուկյան), Հայ գրականությունը տապանաքարերու վրա. ԺԶ, ԺԷ, ԺԸ և ԺԹ դար («Բազմավեպ», 1929, հ. 22), Գ. Հնասեր (Մանուկյան), Անհետացած հայերեն արձանագրություններ Կ. Պոլսո մեջ («Բազմավեպ», 1930, հ. 28), Գ. Ա. Գասպարյան, Հ. Հ. Խաչյան, Ազգային գերեզմանատուն հայոց Շիրիլի, Կ. Պոլսո, 1922, Հ. Քոսյան, Հայքի Զմյուռնիա և շրջակայս, հ. Ա, Զմյուռնիա և հայք, Հետազոտություն արձանագրությանց և հիշատակարանաց, Վիեննա, 1899, Հ. Քոսյան, Գերեզմանատուն կաթողիկե հայոց Կ. Պոլսո, Վիեննա, 1931, Հ. Քոսյան, Բարձր Հայք, հ. Ա, Կարին քաղաքը, Տեղագրություն, պատմություն, սովորություններ. Վիեննա, 1925, Ա. Գարտաշյան, Նյութեր նգիստոսի հայոց պատմության համար, Գահիրե, 1943, «Ազգագրական հանդես», գ. XVII, 1908, Ն 1:

² Գ. Հնասեր, Հայ գրականությունը տապանաքարերու վրա..., էջ 18:

³ Հ. Աճեմյան, Հայերեն տապանագիրներու արժեքը («Բազմավեպ», 1934, հ. 28, էջ 166):

Հայ վիմագիր գրականության հետաքրքրական կողմերից մեկը նրանում մեր ժողովրդի պատմության ու տարագրության արձագանքն է: Հայ թե՛ գյուղական և թե՛ քաղաքային բնակչությունը, չկարողանալով իր աշխատանքով հայրենի երկրում հայթայթել ընտանիքի ապրուստի միջոցներ կամ զւկված լինելով հողից, ինչպես նաև հարստահարությունների ու բռնությունների ճնշման տակ, հարկադրաբար թողնում էր տուն ու տեղ, հարազատներին, դիմում պանդխտության: Պանդխտության մեկնածներից շատերը հայրենիք էին վերադառնում տարիներ անց, ծերացած, երիտասարդ կյանքի տարիներն օտարության ու թշվառության մեջ անցկացրած:

Չափածո գործերից մեկում նկատի առնելով օտարների ու շահագործողների արհամարհանքը, ամենօրյա չարքաշ կյանքի բեռը, հարազատներից հեռու մնալու կարոտը, ինչպես նաև օտարության մեջ մեռնելու երկյուղը՝ հայրենակիցներին խորհուրդ է տրվում ինչ վիճակի մեջ էլ որ գտնվելիս լինեն հայրենի երկրում, չբռնեն պանդխտության փշոտ ու կորստաբեր ճանապարհը: Իայց եթե, այնուամենայնիվ, դիմում են պանդխտության, ապա թող անպայման վերադառնան հայրենիք, հարազատների գիրկը:

Պանդուխտ եղբարք՝ օրինակ
Ըլլայ ձեզի իմ վիճակ,
Փութաք յերկիր ձեր երթաք՝
Օտար հողոյ տակ չ'մնաք⁴: (1881 թ.):

Պանդուխտ հայի անապահով, ամենքից արհամարհված ու լքված կյանքն է պատկերված ժողովրդական բանահյուսության հետևյալ սրտահույզ տողերում:

Ղարիպ եմ օտար երկիր,
Սիրտս նեղի, կեանքս սպառի,
Թէ սրտիս խասրաթն ասեմ՝
Ապառաժ քարերն պատառի⁵:

Օտարության դիմելը մեծ ողբերգություն էր և իզուր չէր, որ այն ժողովրդի բերանում դարձել էր անեծք:

Եւ թէ մարդ մարդոյ անիծէ՝
Թող ասէ՝ ղարիպանաս,
Ի ղարիպութիւն երթաս՝
Ղարիպի հալն իմանաս⁶:

Պանդխտությունը, որպես ազգային շարիք, բավականին լայն արձագանք է գտել գեղարվեստական դրականության մեջ: Օտար երկրներ պանդխտության մեկնածների կարեկցանքով լի կյանքն են պատկերել Մկրտիչ Նաղաշը, Նահապետ Քուչակը, XVI—XVII դդ. հայ տաղասացները: Մ. Նաղաշը, օրի-

4 Գ. Ա. Գասպարյան, Հ. Հ. Խոշյան, նշվ. աշխ., էջ 265:

5 «Ողբ ղարիպի ասացյալ» («Արևելյան մամուլ», 1873, հունիս, էջ 264):

6 Նույն տեղում:

նակ, գունեղ ու սրտահույզ կերպով է պատկերել հայրենիքից, հարազատեն-
րից բաժանված, պանդխտության մեջ իր գոյությունը քարշ տվող հայ մարդու
վիճակը:

Հոգի մի ասեր դարիպ, թէ չէ՝ իմ սիրտս կարունի,
Ղարիպն ի յօտար երկիր, գէմ խիստ դիժար կու լինի.
Զինչ հաւն երամէն ի զատ, մոլորած ի տեղ չի հանգչի,
Այնչափ երերուն կենայ, մինչոր իւր տեղն հասնի⁷:

Հայ ժողովրդի զավակները դարեր շարունակ ճաշակելով պանդխտության
դառը պտուղները, վիճագիր արձանագրությունների մեջ ևս, ինչպես նշվեց,
թողել են պանդխտությանը նվիրված սրտաշարժ երգեր, որոնք արտահայ-
տում են հայրենի բնաշխարհից հեռացած հայ աշխատավոր մարդու հոգե-
կան տագնապն ու կարոտը, մտորումներն ու խոհերը⁸:

Պանդխտությանը նվիրված վիճագիր բանաստեղծություններին թեև հա-
տուկ է թեմատիկ ընդհանրությունը, բայց, այդուհանդերձ, յուրաքանչյուր
բանաստեղծության մեջ առավել շեջտվում է այդ ընդհանրության որևէ կող-
մը: Մի դեպքում դա հայրենիքի ու հարազատների հանդեպ տածած կարոտի
զգացմունքն է, մյուս դեպքում՝ պանդուխտի չարքաշ կյանքը, թախիժը, ճիչը՝
սոցիալական անարդարության դեմ, անդրշիրիմյան աշխարհում փրկություն
գտնելու սին երազանքը և այլն:

Պանդխտության տարիներին կրած անլուր տառապանքները չեն մոռաց-
վում նույնիսկ տարիներ անց, մասնավանդ, երբ պանդուխտ հայը մի օր հի-
վանդության մահճին է գամվում: Որքա՛ն տառապանքներ, որքա՛ն սին երա-
զանքներ են ի դերե ևլել նրա սպասելիքներով ու հույսերով լի կյանքում:

Պանդխտութիւն, ի՞նչ ահեղ
Յաւեր կուտաս դու մարդուն,
Երբ խեղճ պանդուխտն օտար տեղ՝
Կ'ինկնի մահիճ սեւ մահուն⁹: (1881 թ.):

Պանդուխտ հայ աշխատավորի համար դառը վերհուշ են այն ծանր տա-
րիները, որոնք անցել են օտարության մեջ.

Ո՛հ, պանդխտութիւն, դառն ճակատագիր,
Դու քանի՛, քանի՛ կեանս մարդկային,
Յանձնես ձեռս ատրովպէան կարեկիր՝
Նման դարձ վճիռ աստուածային¹⁰:

Մարդկային անհատը աշխարհ է գալիս կյանքի բարիքները վայելելու
ակնկալությամբ, սակայն հասարակական կյանքում տիրող սոցիալական ան-
հավասարության պատճառով նա իր կյանքը հաճախ անց է կացնում զրկանք-
ների մեջ, հայրենիքից ու հարազատներից հեռու:

⁷ Մկրտիչ Նաղաշ, Աշխատասիրությամբ էգ. Խոնդկարյանի, Երևան, 1965, էջ 165:

⁸ «Հայ ժողովրդական պանդխտական երգեր», Տեքստը պատրաստեց, ներածությունը գրեց
և ծանոթագրեց Մ. Մկրտչյան, Երևան, 1961:

⁹ Գ. Գ. Գա ս պ ա ղ յ ա ն, Հ. Հ. Խ տ շ յ ա ն, Նշվ. աշխ., էջ 265:

¹⁰ Նույն տեղում:

Տխուր և հուսահատ է հնչում պանդխտության գիրկն ընկած հայ մարդու
սխալը:

Եւ աշխարհ եկայ ուրախութեամբ,
Պանթղթութիւնը հոգիս վառեց,
Հօրմէս, մօրմէս զուրկ՝ լալօվ՝
Չ'դազրիր աչքս լալօվ¹¹: (1865 թ.):

Հայ վիմագիր բանաստեղծությունների մեջ մանավանդ լայնորեն է պատկերված պանդխտ հայ աշխատավորի իրավազուրկ ու հարստահարված, նյութական ծանր վիճակը. աշխատավորը օտարության է դիմում քիչ թե շատ ապահով կյանք ստեղծելու հույսով: Հուզիչ է, օրինակ, Մշո աշխարհից պանդխտության մեկնած հայ կնոջ կյանքի նկարագիրը: Նա հայրենիքում, չկարողանալով հոգալ իր չորս զավակների ապրուստը, հարկադրված դիմել է պանդխտության՝ դեպի Պոլիս:

Եկի ի Պոլիս չորս որբ զաւակօք,
Որ վերջը դառնամ երկիրս շահօք¹²: (1862 թ.):

«Շահօք» վերադառնալու փոխարեն նա հեռավոր այդ քաղաքում կրում է շարքաշ կյանքի բոլոր դժվարություններն ու փորձությունները, և ի վերջո անապահով կյանքը հիվանդության դուռն է գցում թշվառ ու անօգնական կնոջը: Տնտեսական բարվոք կյանք ստեղծելու փոխարեն նա այդ տարիներին ձեռք է բերում «ցաւ մը անդարման» և պանդխտության մեջ կնքում է իր մահկանացուն, բախտի քմահաճույթին թողնելով ողբաձայն որբերին:

Եղաւ ինծի շահ ցաւ մը անդարման,
Հացին, ողբացին որբերս ողբաձայն,
Բաց ի աստուծոյ ոչ կայ յոյս որբոցս,
Այն եղեւ կրակ անբուժելի ցաւոցս:
Շատ աշխատեցայ՝ չգտայ դարման,
Վերջը զիս ձգեց պանդխտ գերեզման¹³: (1862 թ.):

Տխուր ու շարքաշ է եղել նաև արաբկիրցի հայ կնոջ կյանքն անցյալում: Տնտեսական հոգսերն ու կյանքի աննպաստ պայմանները մաշել են նրա զգայուն հոգին: Այդ ամենի հետ մեկտեղ էլ ավելի ծանր վիճակ է ստեղծվել նրա համար, երբ նա իր կյանքի վերջին տարիներն ակամայից անց է կացրել պանդխտության մեջ՝ հեռու հայրենի եզերքից, հարազատների կարոտը սրտում: Նա գիտակցել, կանխազգացել է, որ կյանքի պայմաններն այնպիսին են, որ ինքը, ի վերջո, իր վախճանը չի գտնելու հայրենի երկրում, մնալու է օտարության մեջ:

Ծնայ յԱրապկիր, ուր իմ հայրենիք,
Ուր ես հարսնացայ ի հասակ ծաղիկ.
Ո՛հ, յօտարութեան՝ ի թարմ հասակիս,

¹¹ Նույն տեղում:

¹² «Բաղմավեպ», 1929, հ. 22, էջ 22:

¹³ Նույն տեղում:

Սեւ նարօտ մահուան կապեցաւ գլխիս.
Կարօտ հայրենեաց անձկալիւր հոգիս,
Ո՛հ, ամփոփեցաւ ի յօտար շիրմիս¹⁴, (1889 թ.):

Հաշտվելով օտարության մեջ կյանքին հրաժեշտ տալու գառն իրողության հետ, հայ կինը փորձում է վիշտն ու տխրությունը փարատել այն հավատով, թե ինքը ոչ թե մեռնելու է, այլ գնալու է աստծուն «ի տես»:

Վիմագիր բանաստեղծությունների մեջ հստակորեն շեշտվում է պանդուխտ հայի հայրենիքը, ծննդավայրը: Ուր էլ որ հասած լինի, ինչ վիճակի մեջ էլ որ գտնվելիս լինի, նա երբեք չի օտարանում իր ծննդավայրից: Այն չի մոռացվում, քանի որ հայրենի երկրի՝ ծննդավայրի, հետ են կապված նրա կյանքի թե՛ տխուր և թե՛ ուրախ պահերը և որ կարեւորն է՝ այնտեղ է թողել նա իր հարազատներին՝ ծնողներին, քրոջն ու եղբորը, կնոջն ու սիրած էակին. թանկագին սրբություններ, որոնց ոչինչ չի կարող մոռացնել տալ, որովհետև նրանց կարոտը երբեք չի ստվերվում ժամանակի թանձր նստվածքով:

Ընթանասուն մէկ տարեկան
Բրգնիկի զաւակ էր ան.
Խմեց լեղին պանդուխտ կեանքի,
Դիւցազ մ'եղաւ սշխատանքի¹⁵, (1842 թ.):

Այս քառատողում ոչ միայն շեշտվում է պանդուխտ հայի ծննդավայրը, հայրենի Բրգնիկը, այլև բնորոշվում է յոթանասունմեկամյա ծերունու ողջ կյանքի ուղին: Նա թեև ապրել է պանդուխտի չարքաշ կյանք՝ խմելով «լեղին պանդուխտ կեանքի», բայց օտարության մեջ զօր ու գիշեր աշխատել է ազնվաբար ու նվիրումով, որպես «դիւցազ մ'» աշխատանքի, այն հավատով, թե կկարողանա իր վաստակով ձեռք բերել օրվա ապրուստը և դրանից բաժին հանել նաև հարազատներին: Աշխատավոր հայ մարդը միաժամանակ հավատացել է, թե իր ազնիվ աշխատանքով կարելի կլինի դուրս գալ այն թշվառ ու անմխիթար վիճակից, որի մեջ գտնվում են ինքը և իր նմանները: Բրգնիկցի ծերունին պանդուխտության մեջ է կնքել իր մահկանացուն այն սին հավատով, թե երկնային ամենակարող տերը իր մահից հետո տերունական լույսով կպսակի իր ճակատը:

Տէր, քո լոյսով պսակէ ալ՝
Քրտնած ճակատը վաստակեալ¹⁶, (1842 թ.):

Փառակեցի պանդուխտ հայի համար թշվառ վիճակից դուրս գալու միակ ելքը մահն էր՝ այն զորավոր ուժը, որ վերջ է դնելու պանդուխտի չարքաշ կյանքին: Նա հույս է ունեցել, թե մահից հետո երկնային տերը չի մոռանա իրեն պարգևել անանց կյանք, անմահացնել:

14 Գ. Ա. Գաւապոյան, Հ. Հ. Խոշոյան, նշվ. աշխ., էջ 176:

15 Հ. Քոսյան, Գերեզմանատուն կաթողիկէ հայոց, էջ 163:

16 Նույն տեղում:

Տեղեաւ գոլով նախջեւանցի,
Գողթան տանէն Փառակեցի,
Ի սոյն քաղաքս¹⁷ հանդիպի,
Եւ յանանց կեանսն փոխի¹⁸, (1771 թ.):

Ասացինք, որ բոլոր պանդխտներին չէր, որ բախտ էր վիճակվում վերադառնալ հայրենի օջախ, ումանք պանդխտության մեջ էին մնում մինչև խոր ծերություն: Ավելի ողբերգականն այն էր, որ շատ պանդխտներ երիտասարդ հասակում էին հափշտակվում «ի նետէ մահուն».

Քաջ երիտասարդ Յովհաննէս անուն,
Պարզամիտ և հեզ՝ լեալ ի բնութին.
Մինչ էր ի Պոլիս՝ զուրկ ի հայրենւոյն,
Լինելով պանդխտ ի յօտարութին,
Յափշտակեցաւ ի նետէ մահուն¹⁹:

XVIII—XIX դդ. հայ վիմագիր բանաստեղծությունների մեջ հիմնականում արտացոլված են այն պանդխտների կյանքը և հոգեկան ապրումները, ովքեր օտար ափերում են՝ կնքել իրենց մահկանացուն: Նման ստեղծագործություններից պարզվում է, որ Կ. Պոլիսը դեռ հնուց հեղեղվել էր հայ պանդխտներով և դրանց մեջ իրենց բաժինն ունեն Արևմտյան Հայաստանի բոլոր գավառների հայ բնակչությունը. հատկապես մեծ թիվ են կազմել Սեբաստիայի գավառի Բրգնիկի հայերը: Նրանք չկարողանալով վերադառնալ իրենց հայրենի երկիրը, միշտ կարոտով են հիշել իրենց ծննդավայրը: Նրանց թախիծը լի է անխառն կարոտով ու ափսոսանքով.

Ո՛վ արհաւիրք դառն մահուան,
Յանկարծ ձգեց զիս յայս տապան,
Յօտար երկիր պանդխտութեան²⁰... (1889 թ.):

Կամ՝

Փոխեալ ի կեանս անզրուական,
Թողեալ ի սուգ զիւր տոհմն համայն,
Ինքն ի գիւղէ Բագրատունեան,
Հոս կըհանգչի պանդխտական²¹, (1858 թ.):

Վիմագիր բանաստեղծությունների մեջ դրսևորված է նաև կյանքի երեվույթների մի այլ կողմ. բանաստեղծության հերոսը՝ տվյալ դեպքում պանդխտ հայը, ի վերջո ի վիճակի չլինելով հասկանալ իր շարքաշ կյանքի պատճառը, գալիս է այն թյուր համոզման, թե այն ամենը, ինչ կատարվում է իրականության մեջ, տեղի է ունենում երկնային տիրոջ կամքով: Նա է, որ անո-

17 Նկատի ունի Զմյուռնիան:

18 Հ. Քոսյան, Հայք ի Զմյուռնիա, հ. Ա, Վիեննա, 1925, էջ 94:

19 Մեղակալ, 1930, հ. 29, էջ 174:

20 Հ. Քոսյան, Գերեզմանատուն կաթողիկե հայոց..., էջ 178:

21 Նույն տեղում, էջ 167:

ղոթաբար վճռում է յուրաքանչյուր մարդկային էակի կյանքի ընթացքը: Ահա թե ինչու պանդուխտը, հաշտվելով այդ մտայնության հետ, այսինքն՝ մարդու կյանքն ապավինելով ճակատագրի քմահաճ խաղին, սփոփել է իրեն այն սին մտքով, թե ինքը այս աշխարհից հեռանալու է աստծո կամքով, հետևապես առանց սարսափի ու տրտունջի պետք է ընդունի մահը՝ որպես անխուսափելի մի ճշմարտություն:

Պանդխտեցայ հայրենիքէս,
Հոս գոհ էի իմ վիճակէս,
Մահը զրկեց ամէն բանէս,
Ստեղծողին սուրբ կամքն այսպէս²²: (1888 թ.):

Վիմագիր բանաստեղծություններում ականերէ է նաև այն համոզմունքը, թե երկրային կյանքը (լինի դա պանդխտության մեջ, թե բարեկեցիկ պայմաններում) անցողիկ է ու անկայուն, և որ մարդու համար մնայուն ու հավերժական հայրենիքը դա երկնային կյանքն է: Ըստ այդմ՝ երկնային կյանքի արժանանալով, մարդը ձերբազատվում է ամեն տեսակ հոգսերից ու տառապանքներից և միայն այնտեղ կարող է ապրել հավերժական կյանքով:

Վարուքն ամբիժ եւ սըրբասուն,
Պանդուխտ յերկրի անկայուն,
Ըզհայրենիս խնդրեաց յերկին
Յոթեւանս անմահին²³, (1866 թ.):

Վիմագիր մի բանաստեղծության մեջ ճգնավորի կյանք վարող հայ մարդն իրեն համարում է «հին տոհմ մեծ ազգի»: Բանաստեղծության մեջ պատկերված է նրա անցած կյանքի դժվարին ճանապարհը, մի կյանք, որը լի է ողբերգությամբ: Դա խավարամիտ միջավայրում ապրած ու տառապած մարդկային անհատի կերպարն է, որ իրական գույներով հառնում է մեր առջև: Նա անտեղծունջ թողնելով կնոջն ու երեխաներին, ճգնավորի կյանք է վարել, որովհետև հավատացել է, թե օտարության մեջ և ճգնավորի կյանք վարելով կկարողանա՝

Տեսանել զնա,
Ում զինուորեցայ²⁴:

Նա ևս իր մահկանացուն կնքում է օտարության մեջ:

Ի Շամքոր ծնեալ,
Ի Վիրս պանդխտեալ,
Թողի զՏփլիս,
Զկին, զորդիս,
Յանձնեալ տեառն զիս,
Մտի յայս կղզիս²⁵, (1855 թ.):

²² Հ. Քոսյան, Բարձր Հայք, հ. Ա, էջ 484:

²³ Հ. Քոսյան, Դերեղմանատուն կաթողիկէ հայոց..., էջ 117:

²⁴ «Ազգագրական հանդես», 1908, գ. XVII, էջ 83—84:

²⁵ Նույն տեղում: Նկատի ունի Սևանա կղզին:

Ինչպես կարելի է նկատել՝ տնտեսական ու քաղաքական ծանր պայմաններինց ելք չգտնելով, աշխատավոր մարդը անցյալում ակամա ապավինել է աստծուն, մի իրողություն, որը սոսկ մխիթարանք էր և ոչ թե հարցի լուծում:

Հայ վիճադիր բանաստեղծություններում թվում է, թե սոսկ մարդկային առանձին անհատների թախիծն ու մտորումներն են պատկերված, սակայն իրականում այդ թախիծը համազգային է, քանի որ նույն այդ դժբախտ ճակատագիրը բաժանում են հազարավոր ու հազարավոր բնավեր հայեր: Նրանց բոլորի թախիծն ու մտորումները, տագնապները նույն ելակետն ունեն, նույն դրդապատճառը: Տխրությունն ու հայրենակարոտ թախիծը ընդհանուր են որովհետև պանդխտության և քաղաքային ինքը ընդհանուր էր՝ համազգային:

Ցաւ է սիրտի այս միայն,
Որ հայրենեաց չէ դամբան.
Քանի՜ հազար ինձ նման
Հանգեաւ օտար դերեզման²⁶, (1900 թ.):

Սակայն բոլորը չէ, որ հաշտվել են մահից հետո օտարության մեջ մնալու մտքի հետ: Ոմանց միակ փափագն ու ցանկությունն է, որպեսզի իրենց մահից հետո, եթե ոչ մարմինը, գոնե սիրտը թաղվի հայրենի հողում:

Ի հրամանի իւր կտակի՝
Սիրտն հանեալ մարմնոյն անտի
Եւ առաքեալ իւր հայրենի՝
Որ է դեօղն Զուղա ասի²⁷, (1751 թ.):

XVIII—XIX դդ. հայ վիճագիր բանաստեղծությունների մեջ ուրույն երանգով ու հուզականությամբ է հնչում աշխարհին հրաժեշտ տվողի ձայնը, երբ նա դիմում է ոչ միայն իր հարազատներին, այլև իր հայրենի երկրին ու հարազատ վայրերին: Նա թախծում է ոչ միայն հայրենիքի կարոտից, այլ նաև այն բանից, որ երբեք չեն իրականանալու իր իղձերը: Գեղեցիկ հայրենիքը կրկին տեսնելու փափագից այրվող աշխատավոր հայ մարդու անկեղծ ու սրտաբուխ հառաչանքն ու տրտունջն է խտացված ստորև բերվող վիճագիր տողերում:

Ա՛հ, իմ քաղձանքներ մնաց անկատար,
Ո՛հ իմ հայրենիք, սիրուն Արաբկիր,
Ալ չեմ շնչելու քո անուշ հովեր...²⁸, (1878 թ.):

Հուզիչ է նաև վանեցի պանդուխտ հայի հրաժեշտի խոսքը՝ ուղղված պանդխտության մեջ դեգերող իր բազում հայրենակիցներին: Նա թախանձագին խնդրում է իր հայրենակիցներին՝ լսել իրեն, որպեսզի ինքը նրանց գոնե մեկ անգամ պատմի օտարության մեջ կրած իր տառապանքների, կորցրած ու թշվառության մեջ գտնվող իր հայրենիքի մասին: Նա հուսով է, որ այդ զրույցը կարող է թեթևացնել իր կրած տառապանքներն ու զրկանքները:

²⁶ Ա. Գարտաշյան, Նյութեր եգիպտոսի հայոց պատմության համար, էջ 167.

²⁷ «Բազմավեպ», 1929, էջ 323.

²⁸ Ա. Գարտաշյան, Նյութեր եգիպտոսի հայոց պատմության համար, էջ 297.

Պանդուխտ հայ, քիչ մը կեցիր հոռ
Ու հարց մ'ուղղէ քարիս անխոս...²⁹ (1846 թ.)

Ո՞րն է մտահոգիչ այն պարագան, որ ծանրացել է պանդխտության դիմած վասպուրականցի հայի սրտին։ Մարդկային այս անհատի համար ևս դժվար է կորցնել ոչ միայն հարազատներին, այլև հայրենի երկիրը։

Ղարիպ թողի Վարազ ու Վան,
Ա՛խ, շտեմած Վասպուրական,
Ննջեմ պիտի հոս յաւիտեան...³⁰ (1846 թ.)

Պանդուխտ մարդու ոչ միայն կյանքի թելն է կտրվում, այլև նրա տխուր վախճանի հետ գերեզման են իջնում տարիների փայփայած երազանքներն ու հույսերը։ Կենդանի և հուզիչ խոսքերով է պատկերված հայ մարդու կյանքում կատարված ճակատագրական փոփոխությունը հետևյալ քառատողում։

Աննման գարունս աշնան փոխվեցաւ,
Գոսացուց, խամրեց կեանքս կրծոց ցաւ,
Ու լուռ, դալկահար հողին յանձնեցի
Պանդուխտի անուրջս, յոյսերս հայեցի³¹ (1897 թ.)

Պանդուխտն իրեն սփոփում է այն մտայնությամբ, թե մահը այն հզոր և անդիմադրելի ուժն է, որից նույնիսկ թագավորներն ու իմաստունները չեն կարողացել խույս տալ։

Ո՞ր իմաստուն, ո՞ր թագաւոր
Անմահ մընաց մարմընաւոր.
Մահը մարդոց դաշինք չըներ,
Կառնէ տանի մէծեր, փոքրեր³² (1879 թ.)

Պանդուխտության մեջ կրած տառապանքները, ազգային ու կրոնական հալածանքները օտարության մեջ գտնվող հայ աշխատավոր մարդու սրտից չեն կարողացել ջնջել սերը դեպի իր թշվառ հայրենիքը, չեն մեռցրել դեպի հայրենիք ու հարազատների գիրկը վերադառնալու հավատն ու հույսը։ Պանդուխտության դիմելու և կրկին հայրենի երկիր վերադառնալու հավատով են տոգորված շատ վիմագիր բանաստեղծություններ։

Բաբէ, բախտ իմ կուրութեան,
Որ զարար զիս արժանի՝
Կատարելով զփափագ սրտիս՝
Դառնալ յիմ տուն հայրենի...³³ (1828 թ.)

²⁹ Նույն տեղում, էջ 59։

³⁰ Նույն տեղում։

³¹ Նույն տեղում, էջ 299։

³² Գ. Ա. Գ ա ս պ ա Ր յ ա ն, Հ. Հ. Խ տ շ յ ա ն, նշվ. աշխ., էջ 202։

³³ Ա. Գ ա Ր տ ա շ յ ա ն, նշվ. աշխ. էջ 32։

Այսպիսով, պանդխտների մասին XVIII—XIX դարերում սահմանված վիմագիր բանաստեղծությունները պատկերում են ուրույն մի աշխարհ, շոշափում պանդխտած հայ աշխատավորը առօրյա հոգսերը, նրա թախիժով ու տխրությամբ լի կյանքի էջերը: Այդ ընկալի վիմագիր բանաստեղծությունները, իհարկե, չէին կարող ստանալ այն ժողովրդականությունը, որպիսին ունեցան պանդխտության երգերը, սակայն, այնուամենայնիվ, պատմա-գեղագիտական առումով դրանք ուշագրավ ստեղծագործություններ են:

ТЕМА СТРАННИЧЕСТВА В АРМЯНСКИХ ЛАПИДАРНЫХ СТИХАХ XVIII—XIX вв.

СЕРГЕЙ ГЕВОРКЯН

Резюме

Армянские лапидарные стихотворения, созданные в XVIII—XIX вв., отражают своеобразный мир пандухта-странника, его повседневные заботы, жизнь, полную тоски и лишений. В этих стихотворениях наряду с описанием тяжелого положения странника на чужбине порою заметен его глухой протест против существующих порядков.